


VIA LUCIS – UDHA E DRITËS



HYRJE

Udhëheqës - Në emër të Atit të Birit e të Shpirtit të Shenjtë

Të gjithë - Amen

Udhëheqës – Jeta është një ecje e pandërprerë. Në këtë ecje nuk jemi vetëm.

I Ringjalluri ka premtuar: *“Unë do jem me ju të gjitha ditët e jetës, deri në mbarimin e botës”* (Mt 28, 20).

Jeta duhet të jetë një ecje ringjalljeje të vazhdueshme. Jemi mbledhur këtu për t’u bërë të ndërgjegjshëm se jeta jonë është një udhëtim Pashkësh bashkë me Të Ringjallurin që ndriçon hapat tanë.

Një ditë një skrib i thotë Mësuesit: *“Unë do të të ndjek kudo që ti të shkosh”* (Mt 8, 19). Kudo: Mbi Kalvar, Gjatë Udhës së Kryqit; nëpër rrugët e botës, gjatë Udhës së Dritës.

Do të rizbulojmë Ringjalljen si burim të paqes, si energji të jetës, si stimul për të gjetur të renë e historisë.

Do ta dëgjojmë të shpallur në *testin biblik*, të komentuar në *eksperiencën shpirtërore*, të zgjeruar në *të sotshmen aktuale*. Që është “e sotshmja” e Hyjit.

(Moment meditimi dhe ndriçim i qiriut të Pashkës)

Prifti - Shpërndaj mbi ne o Atë, Shpirtin tënd të dritës, që të mund të depërtojme në misterin e Pashkëve së Birit tënd të Vetëm, që shënon fatin e vërtetë të njeriut.

Na dhuro Shpirtin e të Ringjallurit dhe na bëj të aftë të duam. Kështu do të jemi dëshmitarë të Pashkëve të Tua.

Të gjithë – Amen.

Jezusi ringjallet së vdekuri

Lexuesi 1 - Nga ungjilli sipas Mateut (Mt 28, 1-6)

Tani në fund të së shtunave, kur po zbardhte dita e parë e javës, Maria Magdalena dhe Maria tjetër shkuan për të parë varrin. Dhe ja, ra një tërmet i madh, sepse një engjëll i Zotit zbriti nga qielli, erdhi dhe e rrokullisi gurin nga hyrja e varrit dhe u ul mbi të. Dhe nga frika e tij, rojet u drodhën dhe mbetën si të vdekur; por engjëlli, duke iu drejtuar grave, u tha atyre: "Mos kini frikë, sepse unë e di se ju kërkoni Jezusin, që u kryqëzua. Ai nuk është këtu, sepse u ngjall".

Lexuesi 2

Pas të shtunës, festa. Pas pritjes në errësirë, vjen drita. Nga gjiri i natës, shpërthen agimi; e vetmja ndër të shumtat, e para ndër të gjitha agimi i Pashkëve, fillimi i një dite që nuk do të ketë kurrë perëndim. Inauguron njeriun e ri: dje i kryqëzuar, sot i ringjallur për të jetuar pa fund. Ai përmbys gjithçka porsigurin e varrit: "Ja unë bëj të re gjithçka"(Ap 21,5). Me pagëzimin na ka dhënë filizin e rinisë. Jemi bartës të së resë. Vdekja ka vdekur. *Ka shpërthyer jeta.*

Lexuesi 3

I ri i sotëm, e re e sotme rrezikon akoma të vrapojë drejt varreve për të balsamosur jetën. Të qash është më lehtë se sa të bësh projekte për jetën. Është urgjente të riungjillëzohemi nga kjo e re që sjell agimi i kësaj dite pa mbarim. "Ungjillëzimi i ri" për njeriun e ditëve të sotme ka në qendër Pashkët. Çfarë do të shërbente qoftë dhe lajmi më i bukur nëse nuk do të ishte *lajmi i mirë* që nuk është vdekja që thotë fjalën e fundit?

Lutja

Jezusi është ringjallur, bota ka nevojë për riungjillëzim.

Bëj që lajmi të tingëllojë gjithmonë i ri.

Dhe bëji gratë mesazhiere entuziaste të rrënjëve të jetës së re: të Pashkëve të tua. Nëpër Krishtin, Zotin tonë.

Të gjithë - **Amen**

Dishepujt gjejnë varrin bosh

Lexuesi 1 : Nga ungjilli sipas Gjonit (Gjn 20,1-9)

Por ditën e parë pas së shtunës, në mëngjes, kur ishte ende errët, Maria Magdalena shkoi te varri dhe pa se guri ishte hequr nga varri. Atëherë rendi te Simon Pjetri dhe te dishepulli tjetër, të cilin Jezusi e donte, dhe u tha atyre: "E kanë hequr Zotin nga varri dhe nuk e dimë ku e vunë". Atëherë Pjetri dhe dishepulli tjetër dolën jashtë dhe u nisën për te varri. Arriti edhe Simon Pjetri që po e ndiqte, hyri në varr dhe pa pëlkurat prej liri që ishin përtokë, dhe rizën, që qe vënë mbi kokën e Jezusit; ajo nuk ishte bashkë me pëlkurat, por ishte e palosur në një vend, veç. Ata në fakt, nuk e kishin kuptuar ende Shkrimin, sipas të cilit ai duhet të ringjallej së vdekurish.

Lexuesi 2

Çfarë bisede e rrëmbyer rreth një varri. Një spektakël i pazakonshëm në një varr të sapohapur: pëlkurat shpërndarë përtokë e shamia e hollë në një kënd. Njerëzit turbullohen përreth varrit dhe përpiqen të kuptojnë diçka.

Lexuesi 3

Rinia do të thonë të vrapojnë në jetë pa u ndalur. Ecnit përpara pa u ngadalësuar. Por nuk është e mundur të qëndrosh gjithmonë të rinj...

Këtu janë Maria Magdalena, Pjetri dhe Gjoni, tre të rinj, që për herë të parë në histori e shohin vdekjen e pushtuar. Është e mundur të qëndrosh të rinj!!

Lutja

Vetëm Ti Jezus i Ringjallur na rijep gëzimin e jetës.

Vetëm Ti na bën të shohim një varr të boshatisur përbrenda.

Na bind që forca jonë nuk ka pushtet përballë vdekjes kur nuk je Ti.

Na bëj të kemi besim te fuqia e Gjithëpushtetshme e Dashurisë, që fiton mbi vdekjen. Nëpër Krishtin Zotin tonë.

Të gjithë - **Amen**

I ringjalluri i shfaqet Magdalenës

Lexuesi 1: Nga ungjilli sipas Gjonit (Gjn 20,11-18)

Por Maria kishte mbetur jashtë varrit, dhe po qante. Dhe, duke qarë, u përkul brenda varrit, dhe pa dy engjëj, të veshur me të bardha. Ata i thanë: "O grua, pse po qan?". Ajo u përgjigj atyre: "Sepse e kanë hequr Zotin tim, dhe nuk e di ku e kanë vënë". Si tha këtë, ajo u soll prapa dhe pa Jezusin, që qëndronte në këmbë; por ajo nuk e dinte se ishte Jezusi. Jezusi i tha: "O grua, pse po qan? Kë kërkon?". Ajo, duke menduar se ishte kopshtari, i tha: "Zot, po e pate hequr ti, më trego ku e vure dhe unë do ta marr". Jezusi i tha: "Mari!". Dhe ajo atëherë u kthye dhe i tha: "Rabboni!", që do të thotë: Mësues.

Lexuesi 2

Maria Magdalena qëndron aty: çon vellon e zisë, vëzhgon varrin. Ëngjëjve që e pyesin ju shpjegon arsyen e vajtimit të saj: "E kanë hequr". Ndihet e paralizuar nga dhimbja. Jezusi akoma i panjohur e thërret për emër: "Maria". Zemra e Marisë përflaket, fytyra i ndriçohet nga gëzimi, shpirti i ndizet: është vetë Ai që e ka thërritur për emër me theksin e tij të veçantë, me atë ngarkesë emocionale krejt të tijën. Maria e thirrur për emër, përgjigjet me emrin tjetër plot dashuri e respekt të pafund: "Mësues".

Lexuesi 3

Bota sot ka akoma shumë për të mësuar. Historia fillon të ndryshojë drejtim. I Ringjalluri i beson një gruaje një detyrë të rëndësishme: t'u shpallë shpallësve lajmin e mirë, të thërrasë që jeta është gjallë; rruga e mbyllur për shekuj ndaj më shumë së gjysmës së qenieve njerëzore, grave, më në fund hapet. Me pasurinë e saj, feminitetin dhe rininë, Maria bëhet për Kishën ruajtësja e gëzimit dhe e jetës.

Lutja

Jezus i Ringjallur ti më thërret sepse më do.

Në të përditshmen time mund të të njoh ashtu siç arriti të të njihnte Maria Magdalena.

Më ndihmo të shkoj nëpër rrugët e botës, në familjen time, në vendet e shumta ku kaloj kohën e lirë, për të kryer detyrën e madhe, që është shpallja e jetës. Nëpër Krishtin Zotin tonë.

I ringjalluri në rrugën e Emausit

Lexuesi 1: Nga ungjilli sipas Lukës (Lk 24,13-19.25-27)

Po ate ditë, dy nga ata po shkonin drejt një fshati, me emër Emaus... Dhe ata po bisedonin midis tyre për të gjitha ato që kishin ndodhur. Dhe ndodhi që, ndërsa po flisnin dhe bisedonin bashkë, vetë Jezusi u afrua dhe nisi të ecë me ta. Por sytë e tyre ishin të penguar kështu që të mos e njihnin. Dhe ai u tha atyre: "Dhe pse jeni të trishtuar?". Dhe një nga ata, duke u përgjigjur tha: "Je ti i vetmi i huaj në Jeruzalem, që nuk i di gjërat që kanë ndodhur këtu në këto ditë? ... Atëherë ai u tha atyre: "O budallenj dhe zemërngathët për të besuar gjithçka që kanë thënë profetët! Por a nuk duhej që Krishti të vuajë gjëra të tilla që të hyjë kështu në lavdinë e tij?".

Lexuesi 2

"Unë jam rruga" pati thënë Jezusi. Ai, rruga e Zotit për njeriun, kryqëzon shtigjet e errëta të njerëzimit të çjerrë përbrenda e të shthurur përjashtë. Emblemën e këtij kryqëzimi ndërmjet hapave të ndritshëm të Jezusit dhe hapave të luhatshëm të njeriut, e gjejmë tek rruga që shkon drejt Emausit, mëngjesin e ditës së Ringjalles. Ishte dita e dritës, por dishepujt ishin të verbër. Ishte dita e gëzimit por dishepujt ishin po aq të trishtuar. Ishte dita e Pashkëve dhe dishepujt ndiheshin si të vdekur.

Lexuesi 3

Njerëzit e kohëve tona, për shkak të informacioneve të shumta dhe angazhimeve, ndihen të dërrmuar nën peshën e trishtimit. Zoti na ndjek përgjatë rrugëve që përshkojmë, na arrin, na befason, na kupton, dhe ne prapëseprapë nuk kemi besim tek Ai.

Lutja

Qëndro me ne Jezus i ringjallur: po bie nata. Do të të gjejmë një strehë.

Do të të japim një pjatë. Do të të japim ngrohtësi. Do të të japim dashuri.

Qëndro me ne, Zot: ne do të jemi në shoqërinë tënde, dhe kjo na mjafton.

Ti që jeton e mbretëron në shekujt e shekujve.

Të gjithë - **Amen**

I ringjalluri shfaqet në thyerjen e ndarjen e bukës

Lexuesi 1: Nga ungjilli sipas Lukës (Lk 24, 28-32)

Kur iu afruan fshatit për ku ishin drejtuar, ai bëri sikur do të vazhdonte më tutje. Por ata e detyruan duke thënë: "Rri me ne, sepse po ngryset dhe dita po mbaron". Edhe ai hyri që të rrijë me ta. Dhe, siç ishte në tryezë me ta, mori bukën, e bekoji dhe, si e theu, ua ndau atyre. Atëherë atyre iu çelën sytë dhe e njohën, por ai u zhduk prej syve të tyre. Dhe ata i thanë njeri tjetrit: "Po a nuk na digjej zemra përbrenda, kur ai na fliste udhës dhe na hapte Shkrimet?".

Lexuesi 2

Zoti hyn në bujtinë. Pas ftesës së ngutshme që i bënë ata të dy, ulet në tavolinë për herë të parë që pas ringjalljes. Fati i njeriut është darka, dmth bashkimi me Hyjin dhe bijtë e Hyjit. Dy dishepujt, të përgatitur nga Mësuesi gjatë rrugëtimit nëpërmjet leximit të Shkrimit të Shenjtë, vërejnë me kujdes ndarjen e bukës. Feja që kishin i ndihmon t'u hapet zemra plotësisht. Është pikërisht Ai, Zoti.

Lexuesi 3

I ri modern ka shumëfishuar rrjetet e komunikimit, porse nuk ka hapur akoma portat e zemrës. Është e domosdoshme të ndiqet shkolla e Emausit. Dy dishepujt e Emausit, me përmbushjen e një gjesti dashurie, përgatiten për eksperiencën qiellore të dashurisë: *Darka*; janë të gatshëm në njohjen e dashurisë; *Rinjohja*. Nëse njerëzit e ditëve të sotme do të fillonin të donin më të vegjlit, të varfërit, të largët, të shtypurit, të gjithë ata që edhe pse nuk bëjnë pjesë në të njëjtin klan, janë gjithsesi bij të Hyjit e jo të panjohur, vetëm atëherë do të arrinin të zbulonin se sytë i kanë të mbyllur me fasho.

Lutja

Jezus i Ringjallur, në Darkën Tënde të fundit si person njerëzor, ke treguar përmes larjes së këmbëve të vetmen mënyrë se si mund të marrim pjesë në Eukaristi.

Zot i lavdisë, na ndihmo të përgatisim kremtimet tona, duke larë këmbët e më të fundëve, duke mirpritur në zemër e në shtëpi "të varfërit, sakatët, të çalët, të verbërit" nevojtarët e ditëve të sotme, që s'kanë tjetër shenjë

njohjeje përveçse të qënurit imazhi yt i gjallë. Ti që jeton e mbretëron në shekujt e shekujve.

NDALESA E GJASHTË: MIQ

I ringjalluri u shfaqet i gjallë dishepujve

Lexuesi 1: Nga ungjilli sipas Lukës (Lk 24, 36-39)

Dhe, ndërsa ata po bisedonin për këto gjëra, vetë Jezusi u shfaq në mes tyre dhe u tha atyre: "Paqja me ju!". Por ata, të tmerruar dhe gjithë frikë, mendonin se po shihnin një frymë. Atëherë ai u tha atyre: "Pse jeni shqetësuar Dhe pse në zemrat tuaja po lindin dyshime? Shikoni duart e mia dhe këmbët e mia, sepse unë jam. Më prekni dhe shikoni, sepse një frymë nuk ka mish e eshtra, si po shihni se unë kam!".

Lexuesi 2

I Ringjalluri është mësuesi i durueshëm në çenakull. Ja një skicë e e pedagogjisë së tij të Pashkëve: përmes fjalës dhe gjesteve ndihmon njerëzit e tij të binden mbi të vërtetën e Ringjalljes. "Më prekni, verifikomëni" (Lk 24,39). I Ringjalluri nuk është një hije. Ringjallja nuk është një përrallë. I Ringjalluri është gjallë. I Ringjalluri është i vërtetë.

Lexuesi 3

Njeriu i ditëve të sotshme pret të takojë dëshmitarë të të Ringjallurit, ekspertë të shenjave. Bota duhet të mundet të prekë shenjat e dashurisë së Kishës së të Ringjallurit. Ne na duhet të familjarizohemi me të Ringjallurin përmes lutjes, përmes Fjalës dhe Eukaristisë. Duhet gjithashtu dhe të jemi në sintoni me botën e sotshme: me varfëritë e saj dhe pavendosmëritë, me ankthet e saj dhe me shpresat, me bastet që presin të fitohen në të ardhmen.

Lutja

Jezus i Ringjallur: Ti je i gjallë e nuk je një fantazëm.

Na dhuro aftësinë të dimë të të trjatojmë si *Të Gjallë* (Ap 1,18).

Dhe na liro nga fantazmat që ndërtojmë për ty.

Na bëj të përshtatshëm për t'u paraqitur si shenja të tuat.

Bota i pret këto shenja që të mund të besojë.

Ti që jeton e mbretëron në shekujt e shekujve.

Të gjithë - **Amen**

I ringjalluri u jep dishepujve fuqinë e shlyerjes së mëkateve

Lexuesi 1: Nga ungjilli sipas Gjonit (Gjn 20,19-23)

Dishepujt pra, kur e panë Zotin, u gëzuan. Pastaj Jezusi u tha atyre përsëri: "Paqja me ju! Sikurse më ka dërguar mua Ati, ashtu unë po ju dërgoj ju". Dhe, si tha këto fjalë, hukati mbi ta dhe tha: "Merrni Frymën e Shenjtë! Kujt do t'ia falni mëkatet, do t'i jenë falur, kujt do t'ia mbani, do t'i jenë mbajtur".

Lexuesi 2

Shpirti i Shenjtë: ja dhurata e parë e Pashkëve që I Ringjalluri, tanimë Zot së bashku me Atin, u jep njerëzve. Me Pashkët, Ati, bashkë me Birin e Tij të Ringjallur, ofrojnë dhuratën e tyre më të madhe. Është lidhja e tyre e përjetshme e dashurisë. Është "puthja e pafundme" e tyre.

Lexuesi 3

Njeriu i sotshëm ka nevojë për jetë. Gjithë bota ka nevojë për paqe dhe pajtim. Ka nevojë për rrjedhojë dhe për Shpirtin. për pasuri të vazhdueshme e Veriut të botës, shkakton mungesën e të mirave materiale të domosdoshme të jetës për Jugun e botës. Por ekziston mundësia e rimëkëmbjes. Kisha e të Ringjallurit ka fuqinë të shlyejë mëkatet tona të mbylljes e të egoizmit.

Lutja

Eja o Shpirti i Shenjtë, *Ti, dhurata e parë* e Jezusit të ringjallur, ji entuziazmi i Atit e Birit në ne, që notojmë në mërzitje e errësi.

Ti, harmonia ndërmjet Atit e Birit, na shtyj drejt drejtësisë e paqes: na liro nga kapsulat tona të vdekjes.

Ti rini e Atit dhe e Birit, na bëj të rinj, njerëz me entuziazëm, ekspertë të Pashkëve.

Ti që jeton e mbretëron në shekujt e shekujve.

Të gjithë – **Amen.**

I ringjalluri konfirmon fenë e Tomës

Lexuesi 1: Nga ungjilli sipas Gjonit (Gjn 20,24-29)

Toma, një nga të dymbëdhjetët, nuk ishte me ta kur erdhi Jezusi. Dishepujt e tjerë, pra, i thanë: "Kemi parë Zotin". Por ai u tha atyre: "Po nuk e pashë në duart e tij shenjën e gozhdave, unë nuk do të besoj". Dhe tetë ditë më vonë, dishepujt ishin përsëri në shtëpi dhe Toma ishte me ta. Jezusi erdhi, ndonëse dyert ishin të mbyllura, dhe u prezantua midis tyre dhe tha: "Paqja me ju!". Pastaj i tha Tomës: "Vëre gishtin këtu dhe shiko duart e mia; shtrije edhe dorën dhe vëre në brinjën time; dhe mos ji mosbesues, por besues!". Atëherë Toma u përgjigj dhe i tha: "Zoti im dhe Hyji im!". Jezusi i tha: "Sepse më ke parë, Tomë, ti ke besuar; lum ata që nuk kanë parë dhe kanë besuar!".

Lexuesi 2

Toma që nuk beson akoma ftohet të prekë me dorë plagët e një të vdekuri të ringjallur. Prek, gjunjëzohet dhe thërret: "O Zoti im e Hyji im!". Ato shenja janë letrat kredenciale të Hyjit, janë firma e Hyjit në veprat e Jezusit të Nazaretit. Janë garancia e deklaratave të tij, që kanë në qendër vetëpohimin e tij: "Unë jam udha. Unë jam e vërteta. Unë jam jeta. Unë dhe Ati jemi një gjë e vetme" (Gjn 14,6;10,30).

Lexuesi 3

Njerëzve të ditëve të sotshme i Ringjalluri u thotë: prekmëni në Kishë, prekmëni te shenjtërit. Ne besimtarëve, na besohet detyra e shumëfishimit të shenjave të ringjalljes, përmes angazhimit në *kulturën e jetës*. Nëse paraqet plagë që mund të preken, nëse paraqet martirë e shërbëtorë, sigurisht që do të jetë e besueshme.

Lutja

O Jezus i ringjallur, të themi çdo ditë me besim, "Zoti im dhe Hyji im".

Zot i jetës shtojë fenë tonë.

Dhurona *fenë* që është rrënja e Pashkëve të tua.

Ti që jeton e mbretëron në shekujt e shekujve.

Të gjithë - **Amen**

I ringjalluri takohet me të tijtë në liqenin e Tiberiadit

Lexuesi 1: Nga ungjilli sipas Gjonit (Gjn 21,1-9.13)

Jezusi iu shfaq përsëri dishepujve pranë Detit të Tiberiadit. Simon Pjetri u tha atyre: "Po shkoj të peshkoj". Dolën dhe hipën menjëherë në barkë; por atë natë nuk zunë asgjë. Në mëngjes herët, Jezusi ndenji te bregu. Dhe Jezusi u tha atyre: "O djema, a keni ndonjë gjë për të ngrënë?". Ata iu përgjigjën: "Jo!". Dhe ai u tha atyre: "Hidhni rrjetën në anën e djathtë të barkës dhe do të gjeni". E hodhën, pra, dhe s'mundën më ta tërhiqnin nga shumica e peshqve... Mbasi dolën në tokë, panë një zjarr me prush dhe mbi të peshk dhe bukë.

Lexuesi 2

Jezusi kërkon bukë. Megjithëse nuk ka nevojë për të; trupi i tij është i lavdishëm. Bën këtë kërkesë në mënyrë që të bashkëndajë përsëri me njerëzit, nevojat e tyre, për të marrë pjesë në mensën e tyre të përditshme. Po ashtu si atëherë kur i kërkonte ujë një gruaje të Samarisë, te pusi i Sikarit. Hyji që kërkon: është një Hyj që akoma s'është kuptuar.

Lexuesi 3

Në portën e botës së sotshme Jezusi troket. Kërkon që të hyjë. Është një botë e lodhur dhe e dëshpëruar, plot me drita por e privuar nga *drita*; plot me suksese që shijohen vetëm nga një pakicë; ndërsa zemra mbetet bosh porsì rrjeta. Jezusi i ringjallur, afrohet dhe kërkon. Kur Hyji do, atëherë dhuron. Kur Hyji përzgjedh atëherë kërkon. Kërkon të shpërndahen shpresa dhe dashuria. Që këto të dyja të ndërtohen me veprime.

Lutja

O Jezus i ringjallur, na jep urtësinë të rivëmë në lojë shpresën edhe pasi kemi provuar dështime.

Ti, I Ringjalluri, ulu në mensën tonë.

Na bëj dëshmitarë të Pashkëve të tua në të përditshmen tonë, me monotoninë e saj, aty i na pret gjithmonë, në rrjedhën e shqetësimeve tona. ulu në tryezën tonë prej njerëzish të nginjur por bosh.

Ti që jeton e mbretëron në shekujt e shekujve.

Të gjithë – **Amen.**

I ringjalluri i dorëzon parësinë Pjetrit

Lexuesi: Nga ungjilli sipas Gjonit (Gjn 21,15-17)

Mbasi kishin ngrënë, Jezusi i tha Simon Pjetrit: "Simon nga Jona, a më do ti mua më shumë se këta?". Iu përgjigj: "Po, Zot, ti e di se unë të dua". Jezusi i tha: "Kulloti qengjat e mi!". Përsëri e pyeti për të dytën herë: "Simon nga Jona, a më do ti mua?". Iu përgjigj: "Po, Zot, ti e di se unë të dua". Jezusi i tha: "Ki kujdes për delet e mia". E pyeti për të tretën herë: "Simon nga Jona, a më do ti mua?". Pjetri u trishtua pse e pyeti për të tretën herë: "A më do ti mua?", dhe iu përgjigj: "Zot, ti di çdo gjë, ti di se unë të dua". Jezusi i tha: "Kulloti delet e mia.

Lexuesi 2

Jezusi i ringjallur takon Pjetrin me zemër të hapur, nën tingullin e lehtë të valëve të liqenit të tij, që përplaseshin në sfond. Pas çdo takimi të madh bëhet dorëzimi i diçkaje të madhe. I nxit deklarata e trefishtë e dashurisë: "Më do ti Simon më shumë se këta?". Tre herë, disa ditë më parë e kishte mohuar. Tre herë, tani, duhej të vinte në vend tradhtinë e dashurisë me një deklaratë të re të përtërirë dashurie.

Lexuesi 3

Njerëzit e ditëve të sotshme, veçanërisht të përfshirë nga shtrëngata e erërat, kanë nevojë më shumë se kurrë për një pikë referimi të qëndrueshme dhe të sigurtë. Kemi nevojë për sigurinë e Krishtit, që kullot qengjat e delet e tij përmes Pjetrit. Të çosh në kullotë është ushqyese. Të çosh në kullotë është të ndriçosh. Të çosh në kullotë është të ngushëllosh. Të çosh në kullotë është të zhvillosh.

Lutja

Ne të falënderojmë, O Jezus i ringjallur, për Pjetrin e sotshëm, Papën tonë Françesku, i cili jeton shërbimin e tij apostolik me shumë bujari e ngrohtësi, në sakrificë të këtyre kohëve kaq të bukura, por dhe kaq të vështira.

Neve, me Pjetrin dhe nën udhëheqjen e tij, na beson një pjesë të grigjës tënde.

Ti që jeton e mbretëron në shekujt e shekujve.

Të gjithë – **Amen.**

I ringjalluri u beson dishepujve misionin universal

Lexuesi 1: Nga ungjilli sipas Mateut (Mt 28,16-20)

Pastaj të njëmbëdhjetë dishepujt shkuan në Galile, në atë mal që u kishte caktuar Jezusi. Pastaj Jezusi u afrua dhe u foli atyre duke thënë: "Mua më është dhënë çdo pushtet në qiell e në tokë. Shkoni, pra, dhe bëni dishepuj nga të gjithë popujt duke i pagëzuar në emër të Atit e të Birit e të Shpirtit të Shenjtë, dhe duke i mësuar të zbatojnë të gjitha gjërat që unë ju kam urdhëruar. Dhe ja, unë jam me ju gjithë ditët, deri në mbarim të botës. Amen".

Lexuesi 2

I Ringjalluri është Zoti i historisë. Fuqinë që Ati i jep, ua transmeton të tijve. Mbi malin e Galilesë inauguron historinë e re. Kjo bashkësi, Kisha, është shtëpi dhe shenjë e dashurisë së Trinisë së Shenjtë. Shtëpi në të cilën të gjithë janë të thirrur. Detyrë e stërmadhe ajo e nisjes së misionit: është dedikim i plotë në shpalljen e lajmit të mirë. Me Pashkët lëvizja nuk mbaron, por fillon. Fusha e punës, vreshta e tij, është bota e tërë, deri në fund të shekujve.

Lexuesi 3

Të rinjtë i ditëve të sotshme, jeton në fushën e pafund të botës. Një botë që bëhet më e ngatërruar me kërkesat dhe dramën e saj, me rrezikun e saj të luftës nukleare dhe me ankthet e dhunës dhe të keqkuptimeve. Po si mund të shkohet nëpër botë? Si të shpallet Lajmi i mirë? Si të shndërrohet bota pa pasur nevojë të përdoret forca? Si të jemi besnikë të Hyjit të historisë dhe të historisë së Hyjit? I Ringjalluri është me ne, deri në fund të botës.

Lutja

Jezusi i ringjallur, shton premtimin e tij ngushëllues:

“Unë do të jem me ju të gjitha ditët e jetës!” (Mt 28,20).

Të vetëm nuk jemi të aftë të bartim të vendosur as peshën më të lehtë.

Ti je forca. Ti je vendosmëria. Ti je guximi. Ti je gëzimi. Ti je drita.

Ti që jeton e mbretëron në shekujt e shekujve.

Të gjithë – **Amen**.

I ringjalluri ngjitet në qiell

Lexuesi 1: Nga Veprat e Apostujve (At 1,6-11)

Ju do të merrni fuqi kur Fryma e Shenjtë do të vijë mbi ju dhe do të bëheni dëshmitarët e mi në Jeruzalem dhe në gjithë Judenë, në Samari dhe deri në skajin e dheut". Mbasi i tha këto gjëra, ndërsa ata po e vështronin, u ngrit lart; dhe një re e përfshiu dhe ua hoqi prej syve të tyre.

Lexuesi 2

I Ringjalluri ka fituar mbi vdekjen. Ka hyrë në sferën e jetës pa fund. Tani ulet në të djathtën e tij. Kështu natyra njerëzore përfshihet në sferën e Hyjit. Asnjë materialist s'do të mundë ndonjëherë t'i japë lavdi materies, aq sa ajo u lavdërua përmes misterit të Ngjitjes në qiell të të Ringjallurit.

Lexuesi 3

Njeriu i ditëve të sotshme, nuk shikon qiellin, i mjafton toka. Të paktën kështu beson. Por qielli është mënyra për t'i përkitur Hyjit të padukshëm. Shenjtërit e eksperimentojnë si bij-trashëgimtarë. I ri i sotshëm, fashuar nga materializmi që ka si qëllim kryesor vetëm të ketë pasuri, të bëjë qejf e të ketë pushtet, nuk ka sy për të parë realitete të padukshme. Vetëm ai që ka bërë të mundur të jetojnë një pjesë të realitetit të bamirësisë qiellore, bijtë e varfër e të uritur të Hyjit, vetëm ai mund të lejohet të hyjë në qiellin e Pashkëve të Përjetshme.

Lutja

Jezus i ringjallur, ke shkuar të na përgatisësh një vend.

Vendi i njeriut-bir është në të djathtën e Hyjit-Atë e Nënë.

Biletën e kemi marrë.

Nuk duhet ta shqyejmë.

Bëj që sytë tanë të jenë të fiksuar atje ku është gëzimi i përjetshëm.

Ti që jeton e mbretëron në shekujt e shekujve.

Të gjithë - **Amen**

Me Marinë në pritje të Shpirtit Shenjtë

Lexuesi 1: Nga Veprat e Apostujve (At 1,12-14)

Atëherë ata u kthyen në Jeruzalem. Dhe, si u kthyen në qytet, u ngjitën në sallën e sipërme, ku rrinin Pjetri dhe Jakobi, Gjoni dhe Andrea, Filipi dhe Toma, Bartolomeu dhe Mateu, Jakobi i Alfeut dhe Simon Zellshmi, dhe Juda i Jakobit. Të gjithë këta ngulmonin me një mendje të vetme në lutje dhe përgjërëm së bashku me gratë, me Marinë, nënën e Jezusit, dhe me vëllezërit e tij.

Lexuesi 2

Në pritje të Shpirtit Shenjtë. Sa zbritën nga mali, u futën në lutje. Jezusi nuk është më i dukshëm. “Mjegulla” e ngjitjes në qiell e ka bërë të palëvizshëm në lavdi. I Ringjalluri nuk është më i dukshëm me sytë e mishit, por mund të arrihet të shihet me sytë e fesë. Bashkësia e Pashkëve i lutet Shpirtit Shenjtë. Tani ai pritet bashkë me dhuratat e tij. Do të vulosë lindjen e Kishës, fillimin e saj si misionare e të Ringjallurit.

Lexuesi 3

Njeriu i ditëve të sotshme, i shpërqendruar nga konsumet e i detyruar të përshkojë shtigje të vdekjes, shkon kësaj rruge duke harruar Hyjin. Por një dritë ndriçon në këtë zhvillim epoke: është Kisha që Krishti ka dashur të lërë për ata që kërkojnë shpëtim. Është Kisha e mbledhur në lutje me ngulmim të njëzëshëm. Kisha që është tejdukshmëria e Krishtit, e afron me Hyjin. Ecja e Çenakullit na dërgon drejt kulturës së jetës.

Lutja

Jezus i ringjallur nga vdekja,
gjithmonë i pranishëm në bashkësinë e Pashkëve,
shpërndaj mbi ne, përmes ndërhyrjes së Marisë, akoma sot këtu,
Shpirtin e Shenjtë tëndin dhe të Atit tënd: Shpirtin e jetës,
Shpirtin e gëzimit, Shpirtin e paqes, Shpirtin e forcës, Shpirtin e dashurisë,
Ti që jeton e mbretëron në shekujt e shekujve.
Të gjithë – **Amen.**

I ringjalluri u dërgon dishepujve Shpirtin e premtuar

Lexuesi 1: Nga Veprat e Apostujve (At 2,1-6)

Kur erdhi dita e Rrëshajëve, ata ishin të gjithë bashkë, në një mendje të vetme, në të njëjtin vend. Dhe befas nga qielli erdhi një ushtimë, si ajo e një ere që fryn furishëm, dhe e mbushi gjithë shtëpinë ku ata po rrinin. Dhe atyre u dukën gjuhë, si prej zjarri, të cilat ndaheshin dhe zinin vend mbi secilin prej tyre. Kështu të gjithë u mbushën me Frymën e Shenjtë dhe filluan të flasin në gjuhë të tjera, ashtu si Fryma e Shenjtë ua jepte të shpreheshin. Por në Jeruzalem banonin disa Judenj, njerëz të perëndishëm, nga të gjitha kombet nën qiell. Kur u dëgjua ajo ushtimë, turma u mbledh dhe u hutua, sepse secili nga ata i dëgjonte të flisnin në gjuhën e vet.

Lexuesi 2

Rrëshajat, marrëveshja e mbajtur. I Ringjalluri përmbush premtimin solemn: “Ngushëlluesi, Shpirti i Shenjtë, që Ati do dërgojë në emrin tim” (Gjn 14,26). Hyji është besnik. U përmbahet takimeve të tij. Ai thotë: “Do të keni forcën e Shpirtit Shenjtë që do të zbresë mbi ju” (At 1,8). dhe me përmbushjen e shtatë javëve të Pashkëve, fjala e tij u bë Rrëshaja: forca e Shpirtit, lindja e Kishës. Njerëzimi i ri në ecje.

Lexuesi 3

Hyji është optimist mbi njeriun. Shpirti i Shenjtë bën vepra të mira: e mira që përmbushet, dashuria që triumfon, gruri që zverdhet. Rrëshaja bashkon njerëzimin e tërë. Duhet të lejoj të veprojë në mua Shpirti i Shenjtë që vepron tashmë në histori. “Fryti i Shpirtit të Shenjtë është dashuri, gëzim, paqe, durim, mirëdashje, bollëk, besnikëri, butësi, zotërim i vetvetes.” (Gal 5,22).

Lutja

Fryj mbi mua Shpirti i Shenjtë, në mënyrë që unë të mendoj gjërat e shenjta. Më shtyj ti Shpirti i Shenjtë, në mënyrë që unë të bëj gjëra të shenjta. Më tërhiq ti Shpirti i Shenjtë në mënyrë që të dua atë çka është e shenjtë. Më forco ti Shpirti i Shenjtë, në mënyrë që të mos humb atë çfarë është e shenjtë.

Ti që jeton e mbretëron në shekujt e shekujve.

Të gjithë – **Amen.**